


宋元通鑑

第四十五册

特279
特279-276
1200501132232
6

第四百廿六號



始



特279
276

宋元通鑑卷第一百四十六

明賜進士前中憲大夫浙江按察司提學副使兩京吏禮郎中武進薛應旂編集

長洲 陳仁錫評閱

元紀十八 起庚午至壬申凡三年

文宗

至順元年春正月丙辰命趙世延趙世安領纂修經世大典事二月壬午籍張珪子五人家資丁亥命江南陝西河南等處富民輸粟補官以粟多寡定為品級有差庚寅以脩經世大典久無成功專命奎章閣阿鄰帖木兒等譯國言所紀典章為漢語纂

修則趙世延虞集而燕鐵木兒如國史例監修。閏月辛卯朔奎章閣學士忽都魯都兒迷失撒廸虞集辭職詔諭之曰昔我祖宗睿知聰明其於致理之道自然生知朕以統緒所傳實在眇躬夙夜憂懼自惟早歲跋涉艱阻視我祖宗既乏生知之明於國家治體豈能周知故立奎章閣置學士員日以祖宗明訓古昔治亂得失陳說於前使朕樂於聽聞卿等其推所學以稱朕意其勿復辭。己亥監察御史言中書平章朶兒只貪污著聞紊亂銓選罷之。乙巳封明宗皇子亦璘質班爲郕王。丁未以伯顏知樞密院

專置右丞

瞻思

事帝以燕帖木兒有大功欲獨相以尊異之乃詔諭中書省曰昔世祖嘗以宰相一人總領世務故政治出於一今燕帖木兒爲右丞相伯顏知樞密院事左丞相其勿復置以阿不海牙爲中書平章政事召瞻思爲應奉翰林文字賜對奎章閣帝問曰卿有所著述否思進所著帝王心法帝稱善詔預修經世大典以論議不合求去。庚戌命市故瀛國公趙鼎田爲龍翔集慶寺永業御史臺臣言不必予其直帝曰吾建寺爲子孫黎民計若取人田而不予直非朕志也。三月戊午廷試進士九十七人賜及第出身有

歸賜
字
答下脫刺

妖

差是科得歸賜、封皇子阿刺忒納答爲燕王、命彰德路歲祭羨里周文王祠、雲南諸王禿堅及萬戶伯忽阿禾等叛、攻陷中慶路、殺廉訪司官、尋自稱雲南王、以伯忽爲丞相、阿禾等爲平章等官、立城柵、焚倉庫以拒命、詔以乞住爲雲南平章政事、帖木兒不花爲雲南左丞、及中都卿小云失從、阿刺忒納失里由八番進討之、己巳、議明宗升祔序于英宗之上、視順宗成宗廟遷之例、壬申、祔明宗神主于太廟、丁丑、賜燕鐵木兒功勳之碑、夏四月壬午朔、命西僧作佛事于仁智殿、自是日始至十二月終罷。

皇后弘吉刺氏與宦者拜住謀殺明宗皇后八不沙、是月天下饑、五月戊午、帝御大明殿、百官上尊號、改元至順、甲子、申命燕鐵木兒爲中書右丞相、戊辰、帝如上都、將立其子阿刺忒納答刺爲皇太子、乃以妥懽帖睦爾乳母夫言、明宗在日素謂太子非其子、黜之、江南驛召翰林學士阿鄰帖木兒奎章閣大學士忽都魯篤彌實書其事于脫卜赤顏、又召虞集使書詔播告中外、辛未、以亦列赤爲中書平章政事、六月辛巳朔、燕鐵木兒言嚮有旨惟許臣及伯顏兼領三職、今趙世延以平章政事兼翰林

失刑

學士承旨奎章閣大學士世延引疾以辭帝曰朕重老成人其令世延仍視事中書果病無預銓選可也
庚子閣徹伯脫脫木兒及通政使只兒哈郎等以燕帖木兒權勢崇重欲謀誅之也的迷失脫逃以變告按問並棄市籍其家雲南宣慰使土官祿余初以討禿堅之功授行省叅知政事乃謀叛附于禿堅羅羅諸蠻因相繼作亂平章帖木兒不花被害詔諸王雲都思帖木兒將江浙河南江西三省兵二萬與湖廣省臣脫歡並討之秋七月己巳中書省臣言近歲帑廩虛空其費有五曰賞賜曰作佛事曰創置

勅遠

衙門曰濫冒支請曰續增衛士鷹坊請加汰減從之
授進士遂魯曾爲翰林院編修時御史劾中丞史顯夫簡傲魯曾曰中丞素持重不能與人周旋御史以人情劾之非公論由是皆知其直丁丑鐵木迭兒子鎖住觀音奴婿野里海牙坐怨望造符籙祭北斗呪詛事覺詔中書鞠之事連前刑部尚書烏馬兒前御史大夫孛羅上都留守馬兒等俱伏誅
閏月癸未監察御史葛明誠言中書平章政事趙世延年踰七十固位苟容請斥歸田里詔中書議燕帖木兒言世延向自陳致仕不允所請御史之言蓋不知有

通鑑卷二百四十五 元紀 文宗 四
旨也。帝曰：如御史言，世延困難在中書矣，其仍任以翰林奎章之職。行樞密言：征戍雲南，軍士二人逃歸，捕獲，法當死。詔曰：如臨戰陣而逃死，宜也。非接戰而逃，輒當以死。何視人命之易耶？其杖而流之。戊申，詔加孔子廟父齊國公叔梁紇爲啓聖王，母顏氏啓聖王夫人，顏子堯國復聖公，曾子邾國宗聖公，子思沂國述聖公，孟子鄒國亞聖公，程顥豫國公，程頤洛國公。羅羅斯土官撒加伯及阿柄土官阿刺里州土官阿答以兵八千，撒毀棧道，遣把事曹通潛結西番，欲據大渡河進寇建昌。四川行省調碉門安撫司

軍八七百，成都等處諸屯兵千人，令萬戶周戡統領，直抵羅羅斯界，以控扼西番及諸蠻都。又遣萬戶胥定遠以軍五千，同卯部知州馬伯所部蠻兵，會周戡等從便進討。是月，江南大水，江浙湖廣尤甚，沒民田五萬一百八十頃，民饑者四十餘萬戶。八月辛亥，雲南躍里帖木兒以兵屯建昌，執羅羅斯把事曹通斬之。己未，帝還大都。壬申，詔興舉蒙古字學。九月庚辰，大寧地震。丙戌，廣源賊閉覆寇龍州。羅回洞、龍州萬戶府移文詰安南國，其國回言：本國自歸順天朝，恪共臣職，彼疆我界，盡歸一統，豈以羅

通鑑卷二百四十六 元紀 五
回元隸本國。遂起爭端。此蓋邊吏生釁。假閉覆爲名。爾本府宜自加窮治。湖廣行省備其言。以聞。命龍州萬戶府申嚴邊防。辛卯。監察御史朶羅台王文若言。嶺北行省。乃太祖肇基之地。武宗時。太師月赤察兒爲右丞相。太傅答剌罕爲左丞相。保安邊境。朝廷遂無北顧之患。今天子臨御。乃命哈八兒禿爲平章政事。其人無正大之譽。有鄙俚之稱。錢穀甲兵之事。懵無所知。豈能昭宣皇猷。贊襄國政。且以月赤察兒輩居於前。而以斯人繼其後。賢不肖固不待辯而明。理宜黜罷。制曰可。冬十月辛酉。帝始服大裘。袞冕。

親祀昊天上帝於南郊。以太祖配享。蓋自世祖至是。凡七世。而南郊親祀之禮始克舉焉。乙亥。賜伯夷序叔齊廟額曰聖清。每歲春秋祀以少牢。十一月辛巳。御史臺言陝西行省左丞怯列坐受人僮奴一人。及鸚鵡。請論如律。詔曰。位至宰執。食國厚祿。猶受人生口。理宜罪之。但鸚鵡微物。以是論賊。失於太苛。其從重者議罪。今後凡饋禽鳥者。勿以賊論。著爲令。辛丑。徵河南行省民間糧稅。不通舟楫之處。得以鈔代輸。十二月己酉。詔以漢董仲舒從祀孔子廟。位列七十二子下。辛亥。立燕王阿剌忒納答剌爲太

范惇

子、監察御史言昔裕宗由燕邸而正儲位、世祖擇者舊老臣如王顥、姚燧、蕭軒等爲之師、保賓客、今皇太子仁孝聰睿、出自天成、誠宜慎選德望老成、學行絕正者、俾之輔導於左右、以宏養正之功、實宗社生民之福也、帝嘉納其言、范惇卒、惇字亨父、一字德機、清江人家、貧早孤、天資穎異、所誦讀輒記憶、雖癯然清寒、若不勝衣、於流俗中、克自樹立、無苟賤意、居則固窮守節、竭力以養親、出則假陰陽之技、以給旅食、耽詩工文、用力精詣、人罕知者、年三十六、始客京師、即有聲諸公間、中丞董士選延之家塾、以朝臣薦爲

翰林編修、秩滿除海南海北道廉訪司照磨、巡歷遐僻、不憚風波瘴癘、所至興學教民、雪理寃滯、遷江西湖東道、又改福建、閩海道知事、天曆二年、授湖南嶺北道經歷、至是卒、年五十九、其所爲詩文多傳於世、四任佐風憲、謹身守法、不可干以私、蔬食水飲、泊如也、吳澄誌其墓、以爲特立獨行之士、可方東漢諸君子、蓋非虛美云、

二年春正月辛卯、太子阿剌忒納答剌卒、二月戊申、立廣教總管府凡十六所、以掌天下僧尼之政、秩正三品、府設達魯花赤總管同知府事判官各一員、

通鑑卷一百四十五 六 總管則僧爲之。壬子、以伯撒里爲中書平章政事。庚午、創建五福太一宮于京城乾隅。三月丙戌、雨土霧、司徒香山言、陶弘景胡笳曲、有負展飛天曆、終是甲辰君之語、今陛下生年紀號實與之合、此受命之符、乞錄付史館、頒示中外、詔翰林集賢諸儒、臣議咸以謂唐開元間、太子賓客薛讓進武后鼎銘、云上玄降監、方建隆基、爲玄宗受命之符、姚崇表賀、宋司馬光言、其采偶就之文、以爲符瑞、此小臣之諂、而宰相實之、是侮其君也、今弘景之曲、雖於生年紀號若偶合者、然陛下應天順人、紹隆正統、于今四年、薄

海內外罔不歸心、固無待於旁引曲說、以爲符命、從其所言、恐啓讖緯之端、非所以定民志也、事遂寢。

浙西水旱、諸路饑民八十五萬餘戶。夏四月庚戌、

真定武陟地震、逾月不止。乙卯、阿剌忒納失里及

各省兵十餘萬、進擒伯忽阿禾、斬之。烏蒙東川諸夷

皆款服、遂復中慶路、遣使獻捷、言叛者或誅或降、雖

已畧定、餘黨逃竄山谷、不能必其不反側、乞分兵鎮

遏之、餘皆遣還、詔從之。五月乙未、纂修經世大典

成。丙申、帝如上都。六月、吳澄卒、澄字幼清、撫州

崇仁人、九歲從羣子弟試鄉校、每中前列、弱冠用力

伯忽阿禾

聖賢之學嘗著說曰道之大原出於天神聖繼之堯舜而上道之元也堯舜而下其亨也洙泗鄒魯其利也濂洛關閩其貞也分而言之上古則羲黃其元堯舜其亨禹湯其利文武周公其貞乎中古之統仲尼其元顏曾其亨乎子思其利孟子其貞乎近古之統周子其元程張其亨也朱子其利也孰爲今日之貞乎未之有也然則可以終無所歸哉其早以斯文自任如此宋末舉進士不第隱居布水谷讀書著述遂以此終不復出元有天下御史程鉅夫奉詔求賢起澄至京師以母老辭歸朝廷命有司即其家錄所著書置于

國子監除江西儒學副提舉以疾去尋爲翰林學士泰定間謝病歸士大夫皆迎請執業而四方之士不憚數千里躡履負笈來學山中者常不下千數百人少暇即著書至將終猶不置也於易書詩春秋禮記各有纂言盡破傳註穿鑿以發其蘊條歸紀叙精明簡潔卓然成一家言作學基學統二篇使人知學之本與爲學之序尤有得於邵堯夫陸子靜之學按定皇極經世書又按正老子莊子太玄經樂律及八陣圖郭璞葬書初澄所居草屋數間程鉅夫題曰草廬故學者稱之爲草廬先生卒年八十五有大星墜其

通鑑卷之百四十一

舍東北、贈臨川郡公謚文正。秋七月戊戌封伯顏為浚寧王。八月甲辰朔日食。辛亥帝還大都。江浙水壞田十八萬八千七百五十八頃。詔皇子古剌答納出居燕帖木兒家。九月祿余復寇雲南。冬十月都元帥怯烈擊走之。祿余既竄伏尋出收召餘黨、列行營六十所、復作亂。寇順元等路、雲南省臣遣都事那海往招之。遇害。既而蒙古都元帥怯烈潛師擊破賊砦、殺五百餘人。禿堅之弟必刺都古象先舉家赴海死。獲禿堅弟二人、子三人、誅之。祿余遁去。餘黨悉平。十一月朔日食。詔養燕帖木兒之子。

怯烈

那海

僧家奴

塔刺海為子、賜居第貲產。十二月癸丑、河北道廉訪副使僧家奴言、自古求忠臣、必於孝子之門。今官于朝者、十年不省親者有之、非無思親之心、實由朝廷無給假省親之制。而有擅離官次之禁。古律諸職官父母在三百里外、三年聽一給定省假二十日。無父母者五年聽一給拜墓假十日。以此推之、父母在三百里以至萬里外者、宜計道里遠近、定立假期。其應省親、匿而不省親者、坐以罪。若詐冒假期、其罪與詐奔喪者同科。命中書省議行。三年春正月壬午、加封孔子妻鄆國夫人、升官氏為

通鑑卷之百四十一 文宗一

大成至聖文宣王夫人、二月、祿余言于四川行省乞降、詔中書樞密院雜議之、邛州有二井、宋名金鳳、茅池、天曆初地震、鹽水湧溢、州民侯坤願作什器煮鹽而輸課于官、詔四川鹽運司主之、三月癸巳、皇古刺答納更名燕帖古思、夏四月戊申、大寧路地震、五月甲戌、撒迪請備錄皇上登極以來固讓大凡往復奏答、其餘訓敕辭命、及燕鐵木兒等宣力効忠之蹟、命朶來續爲蒙古脫卜赤顏一書置之奎章閣、從之、戊寅、京師地震有聲、庚寅、帝如上都、壬辰、太常博士王瓚言諸路請加封神廟、濫及

陳思謙

淫祠、按禮經以勞定國、以死勤事、能禦大災、能捍大患、則祀之、其非祀典之神、自後不許加封、制可、丁酉、白虹並日出、長竟天、追封顏子父顏無繇爲杞國公、謚文裕、母齊姜氏、杞國夫人、謚端獻、妻宋戴氏、兗國夫人、謚貞素、六月己亥朔、錄用朶朶王士熙脫歡等、乙丑、監察御史陳思謙言內外官非文武全才、出處繫天下安危、能拯金革之難者、不許奪情起、復從之、時思謙又言銓衡之弊、入仕之門太多、黜陟之法太簡、州郡之任太淹、朝省之除太速、欲設三策以救四弊、一曰、至元三十年以後、增設衙門、冗濫

不急者從實減并其外有選法者并入中書。二曰宜
參酌古制設辟舉之科。令三品以下各舉所知。得才
則受賞。失實則受罰。三曰古者刺史入爲三公。郎官
出宰百里。蓋使外職識朝廷治體。內官知民間利病。
今後歷縣尹有能聲善政者。受郎官。御史歷郡守。有
奇才異績者。任憲使尚書。其餘各驗資品。通遷在內
者。不得三考連任京官。在外者。須歷兩任。乃遷內職。
績非出類。守不敗官者。則循以年勞。處以常調。凡朝
缺官員。須十二月之上方許遷除。帝可其奏。命中書
議行之。秋七月庚寅。給鈔萬錠。命燕鐵木兒分賜

蘇天爵

累朝宮分嬪御之貧乏者。江南行臺監察御史蘇
天爵慮囚于湖北。湖北地僻遠。民獠所雜居。天爵冒
瘴毒。徧歷其地。囚有言冤狀者。天爵曰。憲司歲兩至。
不言何也。皆曰。前此慮囚者。應故事耳。今聞御史至。
當受刑。故不得不言。天爵爲之太息。每事必究。心雖
盛暑。猶夜篝燈治文書。無倦。明於詳讞。獄多平反。
八月乙巳。天鼓鳴于東北。己酉。隴西地震。帝崩于
上都。廟號文宗。國語稱曰札牙篤皇帝。九月。地震。
冬十月庚子。鄜王懿璘質班即位。王明宗第二子。
留居京師。帝始崩時。燕帖木兒請皇后立皇子燕帖

古思后不從命立鄜王時年甫七歲百司庶務咸啓
皇后取進止。辛丑以撒廸爲平章政事。十一月
戊寅尊皇后爲皇太后。壬辰鄜王薨廟號寧宗。

王禕曰寧宗之立雖母后權臣利於立幼抑文宗
顧命舍其子而立兄子是不可謂非公天下之心
也。然終不足以掩弑兄之惡人心天理吁可畏哉
太后遣右丞闊里吉思迎妥懽帖睦爾于靜江初太
祖取西北諸國阿兒斯蘭率衆來降乃封爲郡王明
宗居沙漠納其裔孫納罕祿魯氏女曰邁來的生妥
懽帖睦爾至順初明宗后遇害遂徙之高麗使居大

青島中尋詔天下言明宗在時素謂非其子移于廣
西之靜江鄜王薨燕帖木兒復請立燕帖古思皇太
后曰吾子尚幼妥懽帖睦爾在廣西今年十三矣且
明宗長子於理當立乃遣闊里吉思往迎之。

宋元通鑑卷第一百四十六

宋元通鑑卷第一百四十七

明賜進士前中憲大夫浙江按察司提學副使兩京吏禮郎中武進薛應旌編集

長洲 陳仁錫評閱

元紀十九 起癸酉至丙子凡四年

順帝一

妖

元統元年春三月燕帖木兒死燕帖木兒自秉權以來肆行無忌一宴或宰十三馬取泰定后為夫人前後尚宗室女四十人有交禮三日遽遣歸者後房充斥不能盡識一日宴趙世延宅男女列坐見坐隅一婦甚麗意欲與俱歸顧左右曰此為誰對曰太師家

人也、自後荒淫日甚、體羸溺血而死、夏五月、京師地震、六月己巳、妥懽帖睦爾即帝位于上都、初帝自廣西迎至、百官具鹵簿迎于良鄉、燕帖木兒既見、並馬徐行、具陳迎立之意、帝畏之、一無所答、燕帖木兒疑其意不可測、故至京久不得立、適太史亦言、其立則天下亂、用是議未能決、遷延者數月、至是燕帖木兒死、皇太后乃與大臣定議立之、且約後當傳于燕帖古思、若武宗仁宗故事、辛未、以伯顏爲太師、右丞相、撒敦爲太傅、左丞相、時有阿魯輝帖木兒者、明宗親臣也、言於帝曰、天下事重、宜委宰相決之、庶

可責其成功、若躬自聽斷、必負惡名、帝然之、由是深居宮中、每事決於宰相而已、無所專焉、是月、大霖雨、京畿水平地丈餘、涇河溢、關中水災、黃河大溢、河南水災、兩淮旱、民大饑、秋七月、霖雨、己亥、太陰犯房宿、八月壬申、鞏昌徽州山崩、立燕帖木兒女伯牙吾氏爲皇后、奎章閣侍書學士虞集謝病歸、初、御史中丞馬祖常求集薦、引其鄉人龔伯璫、集固不從、祖常不悅、帝之將立也、召諸老臣赴上都、集亦預焉、祖常使人告集曰、御史有言矣、蓋以文宗嘗命集書詔、言帝非明宗子、故祖常以是風集使去、集乃謝

病歸臨川集既去侍臣有以舊詔言者帝不懌曰此我家事豈由彼書生邪尋遣使賜酒幣召還禁林會疾作兩目喪明竟不至九月甲午太陰犯填星乙未太陰犯天江庚申秦州山崩冬十月丙寅鳳州山崩戊辰改元元統十一月丙申鞏昌成紀縣地裂山崩辛亥江西湖廣江浙河南復立摧茶運司封伯顏爲秦王秦州山崩地裂十二月壬申遣省臺官分理天下囚罪狀明者處決冤者辨之疑者讞之淹滯者罪其有司

元統二年春正月庚寅朔雨血于汴梁着衣皆赤

怪

怪

張楨

辛卯阿里海牙出爲河南行省左丞相以御史大夫脫別台爲中書平章政事二月己未朔詔內外興舉學校三月己丑朔詔科舉取士國子學積分學校官選有德行學問之人以克是科進士得張楨辛卯以陰陽家言罷造作四年是月山東霖雨水湧湖廣旱浙西水旱疾疫饑民至五十七萬戶夏四月戊午朔日食丁丑太白經天壬午帝嘉許衡輔世祖以不殺一天下特錄其孫從宗爲章佩監提點乙酉中書省臣言佛事布施費用太廣以世祖時較之歲增金三十八錠銀二百三錠四十兩繒帛六

萬一千六百餘疋、請除累朝期年忌日之外、餘皆罷從之。是月、帝時巡上都。河南旱、自是月不雨至于八月。休寧處士陳櫟卒。櫟字壽翁、生三歲、祖母吳氏口授孝經論語、輒成誦。五歲、即涉獵經史。七歲、通進士業。十五、鄉人皆師之。宋亡、科舉廢、櫟慨然發憤、致力於聖賢之學。以朱熹氏爲宗。延祐初、詔科舉取士、櫟不欲就試、有司強之、試鄉闈中選、遂不復赴禮部。教授於家、不出門戶者數十年。所居堂曰定宇。學者稱爲定宇先生。至是卒。年八十三。揭傒斯誌其墓、乃與吳澄並稱、曰澄居通都大邑、又數登用于朝。

陳櫟

天下學者四面而歸之、故其道遠而章尊而明。櫟居萬山間、與木石俱、而足跡未嘗出鄉里。故其學必待其書之行天下、乃能知之。及其行也、亦莫之禦。是可謂豪傑之士矣。世以爲知言、其同郡胡一桂、學者稱

胡一桂

胡炳文

爲雙湖先生。胡炳文、學者稱爲雲峰先生。皆一遵朱子之學云。五月辛卯、以唐其勢代撒敦爲中書左丞相。撒敦仍商議中書省事。贈故中書平章政事

王泰亨

王泰亨、謚清憲。舊令三品以上官立朝有大節、及有大功、勲于王室者、得賜功臣號及謚。時寢冗濫失實、惟泰亨在中書時、安南請佛書、乞以九經賜之、使高

關文興
王氏

麗不受禮遺。為尚書貧不能自給。故特賜是謚。贈
 漳州萬戶府知事關文興英毅侯妻王氏貞烈夫人。
 廟號雙節。初文興從軍漳州。與妻王氏偕行。至元十
 七年。陳弔眼作亂。攻漳州。文興帥兵與戰死之。王氏
 被掠。義不受辱。給賊曰。俟葬吾夫。即汝從也。賊許之。
 遂負尸還。積薪焚之。火既熾。即自投火中死。至是事
 聞。特加褒贈。立廟祀之。六月乙亥。唐其勢辭左丞
 相不拜。復命撒敦為左丞相。辛巳。詔蒙古色目人
 行父母喪。是月。彰德雨白毛。民謠云天雨線。民起
 怨。中原地事必變。秋七月己酉。夜有流星大如酒

怪

盃。其色赤。約長五丈餘。光明燭地。起自天津。没于離
 宮之南。是月至九月。太白屢經天。八月辛未。赦天
 下。京師地震。雞鳴山崩。陷為池。方百里。人死者甚
 衆。九月辛卯。帝還大都。冬十月己卯。上皇太后
 尊號。赦天下。免今年田租之半。始以真哥皇后配
 饗。武宗時議三朝皇后升祔。未決。伯顏以問太常博
 士。遂魯曾曰。先朝既以真哥皇后無子。不為立主。今
 所當立者明宗母那文宗母那。對曰。真哥皇后在武
 宗朝。已膺寶冊。則文明二母皆妾。今以無子之故。不
 得立主。而以妾母為正。是為臣而廢先君之后。為子

遂魯曾

而追封先父之妾。於禮不可。昔燕王慕容垂即位。追廢其母后。而立其生母爲后。以配享先王。爲萬世笑。豈可復蹈其失乎。集賢學士陳顥素疾魯曾。乃曰。唐太宗冊曹王明之母爲后。是亦二后也。奚爲不可。魯曾曰。堯之母爲帝。魯庶妃。堯立爲帝。未聞冊以爲后。而配魯。皇上爲大元天子。不法堯舜。而法唐太宗。邪。衆服其議。而伯顏亦是之。遂以真哥皇后配武宗。擢魯曾爲御史。癸未。命臺憲部官各舉才堪守令者一人。十一月戊子。中書省臣請發兩艘船。下番爲皇后營利。十二月甲戌。詔整治學校。禁私剏寺觀。

庵院。僧道入錢五十貫。給度牒。方聽出家。至元元年春正月癸巳。命察勸農官勤惰。二月乙卯。帝將田于柳林。御史臺臣諫曰。陛下春秋鼎盛。宜思文皇付託之重。致天下於隆平。今赤縣之民。供給繁勞。農務方興。而馳騁冰雪之地。倘有銜檠之變。柰宗廟社稷何。遂止。三月庚子。御史臺臣言。高麗首效臣節。而近年屢遣使往取媵女。至使生女不舉。女長不嫁。乞禁止從之。夏四月己卯。詔翰林國史院纂修累朝實錄。及后妃功臣列傳。禁犯御名。五月戊子。帝如上都。遣使者詣曲阜孔子廟致祭。壬辰。

命嚴謚法以絕冒濫。甲辰伯顏請以右丞相讓唐其勢詔不允命唐其勢爲左丞相。六月庚辰伯顏奏唐其勢及其弟塔刺海謀逆誅之執皇后伯牙吾氏幽于別所初撒敦已死伯顏獨秉政唐其勢忿曰天下本我家天下伯顏何人而位吾上遂與其叔父句容郡王答鄰答里潛蓄異心謀立諸王晃火帖木兒帝數召答鄰答里不至郊王撒撒禿發其謀唐其勢伏兵東郊率勇士突入宮伯顏及完者帖木兒等掩捕獲唐其勢及其弟哈刺海伏誅晃火帖木兒自殺。秋七月壬午伯顏弒皇后伯牙吾氏初唐其勢

亂

事敗被擒攀折殿檻不肯出塔刺海走匿皇后座下后蔽之以衣左右曳出斬之血濺后衣伯顏使人并執后后呼帝曰陛下救我帝曰汝兄弟爲逆豈能相救乃遷后出宮伯顏尋殺之于開平民舍。壬寅專命伯顏爲中書右丞相罷左丞相不置。乙巳罷燕帖木兒唐其勢舉用之人。戊申誅答里阿察赤等于市詔曰曩者文宗皇帝以燕鐵木兒嘗有勞伐父子兄弟顯列朝廷而輒造事釁出朕遠方文皇尋悟其妄有旨傳次于予燕鐵木兒貪利勿弱復立朕弟懿璘質班不幸崩殂今丞相伯顏追奉遺詔迎朕于

通鑑卷二百四十一 元紀
南既至大都燕鐵木兒猶懷兩端遷延數月天隕厥躬伯顏等同辭翊戴乃正宸極後撒敦答里唐其勢相襲用事交通宗王晃火帖木兒圖危社稷阿察赤亦嘗與謀賴伯顏等以次掩捕明正其罪元兇構難貽我太皇后震驚朕用兢惕永惟皇太后後其所生之子一以至公爲心親挈大寶昇予兄弟迹其定策兩朝功德隆盛近古罕比雖嘗奉上尊號揆之朕心猶爲未盡已命大臣特議加禮伯顏爲武宗捍禦北邊翼戴文皇茲又克清大憝明飭國憲爰賜答刺罕之號至于子孫世世永賴可赦天下八月己卯議

恭不華

尊皇太后爲太皇太后許有壬言皇上於太后母子也若加太皇太后則爲孫矣且今制封贈祖父母降父母一等蓋推恩之法近重而遠輕今尊皇太后爲太皇太后是推而遠之乃反輕矣不從 監察御史恭不華率同列上章言嬪母不宜加徽稱太后聞之怒欲殺言者衆懼恭不華曰此事自我發之甘受誅戮決不敢累諸公已而太后怒解曰風憲有臣如此豈不能守祖宗之法乎命賜金幣以旌其直 九月庚辰帝駐扼胡嶺 庚子御史臺臣言國初宦官不過數十人今內府執事不下千餘乞依舊制裁減冗

呂思誠等

濫以廣仁愛之心。省糜費之患。從之。帝還大都。冬十月丁巳。流晃火帖木兒答里唐其勢子孫于邊地。丁卯。監察御史呂思誠等十九人劾奏徹里帖木兒之罪。不聽。皆辭去。惟陳允文以不署名留。十一月庚辰。敕以所在儒學貢士莊田租。給宿衛衣糧。詔罷科舉。初。徹里帖木兒為江浙平章。會科舉。驛請考官。供張甚盛。心不能平。及復入中書。首議罷科舉。及論學校莊田租。可給宿衛士衣糧。動當國者。以發其機。又欲損太廟四祭為一。於是御史呂思誠等列其罪狀。不報。而思誠出為廣西僉事。時罷科舉。詔

張夢臣
馬伯庸
歐陽玄

已書而未用。璽叅政許有壬力爭之。伯顏怒曰。汝風臺臣言徹里帖木兒邪。有壬曰。太師擢徹里帖木兒在中書。御史三十人。不畏太師而聽有壬。豈有壬權重於太師邪。伯顏意稍解。有壬乃曰。科舉若罷。天下才人缺望。伯顏曰。舉子多以賊敗。有壬曰。科舉未行時。臺中賊無筭。豈盡出於舉子。伯顏曰。舉子中可任用者。惟叅政爾。有壬曰。若張夢臣馬伯庸輩。皆可任大事。如歐陽玄之文章。亦豈易及。伯顏曰。科舉雖罷。士之欲求美衣食者。自能尚學。有壬曰。為士者。初不事衣食。伯顏曰。科舉取人。實妨選法。有壬曰。今通事

元中額甚少以矯宋

知印等、天下凡三千三百餘名、今歲自四月至九月、白身補官受宣者、亦且七十三人、而科舉一歲僅三十餘人、科舉於選法、果相妨乎不也、伯顏心然其言、而議已定、不可中輟、乃溫言慰解之、翊日宣詔、特令有壬爲班首、以折辱之、有壬懼禍、不敢辭、治書侍御史溥化、誚有壬曰、叅政可謂過橋折橋者矣、有壬以爲大恥、移疾不出、辛丑、太史上言、星文屢示儆、帝以世祖皇帝在位長久、欲祖述之、下詔改元、詔畧曰、惟世祖皇帝在位長久、天人協和、諸福咸至、祖述之意、良切朕懷、今特改元統三年、仍爲至元元年、監察

李好文

御史李好文言、年號襲舊、於古未聞、襲其名而不蹈其實、未見其益、因言時弊不如至元者十餘事、不報、好文錄囚河東、有李拜拜者、殺人而行兇之狀不明、凡十四年不決、好文曰、豈有不決之獄、如是其久乎、立出之、王傳撒都刺以足踢人而死、衆皆曰、殺人非刃、當杖之、好文曰、怙勢殺人、甚於用刃、况因有所求而殺之、其情爲尤重、乃置之死、河東爲之震肅、十二月乙丑、上太皇太后尊號、戊寅、蒙古國子監成、是月太白屢經天、歲星屢晝見、閏月丁亥、日赤如赭、凡二日、河決封丘、壬寅、徙徹里帖木兒于安

張楨

南徹里帖木兒嘗指斥武宗又以妻弟女為已女冒請珠袍等物於是臺臣復劾其罪而伯顏亦惡其忤已遂流之是年張楨為高郵縣尹門無私謁守城千戶狗兒妻崔氏為其小婦所譖虐死其鬼憑七歲女詣縣訴楨備言死狀尸見瘞舍後楨率吏卒即其所發土得尸拘狗兒及小婦鞫之皆伏辜人稱神明二年春正月壬戌太陰犯右執法甲子太陰犯角宿乙丑宿松縣地震山裂丁卯太隱犯房宿是月置都水庸田使司于平江二月甲申太白經天戊子詔以世祖所賜王積翁田八十頃還其子初積翁

平江水利

賈詔諭日本死於王事嘗受賜後收入宮故復賜之丁酉追尊生母邁來廸為皇后三月戊申以阿里海牙家藏書盡賜伯顏是春每日出如赭夏四月丁亥禁服麒麟鸞鳳白兔靈芝雙角五爪龍八龍九龍萬壽福壽字赭黃等服庚寅以帖木兒不華為中書平章政事撒廸為御史大夫戊戌帝如上都五月丙午朔黃河復于故道乙卯南陽鄧州大霖雨自是日至于六月甲申湍河白河大溢水為災丙辰丁巳太白晝見壬申秦州山崩是月婺州不再至于六月六月辛卯禮部侍郎忽里

台請復科舉取士之制不聽。秋七月庚午，敕賜上都孔子廟碑，載累朝尊崇之意。是月，黃州蝗，督民捕之，人日五斗。八月甲戌朔，日食。高郵大雨雹。詔各邊遠官死而不能歸葬者，有司給糧食舟車護送還鄉，無親屬者，官為瘞之。庚子，詔強盜皆死，盜牛馬者，剽盜驢騾者，黥額，再犯剽盜羊豕者，墨項，再犯黥，三犯剽，剽後再犯者死。盜諸物者，照其數估價。省院臺五府官三年一次審決，著為令。九月戊辰，帝還大都。冬十月己亥，詔每日右丞相伯顏太保定住中書平章政事索羅阿吉刺聚議于內廷，平章

王大中荒政

政事塔失海牙在丞輦，卜班參知政事納麟許有壬聚議于中書。十一月丁巳，遣河南行省平章珙瑒普華於西番為僧。十二月，江州諸縣饑，總管王大中貸富人粟以賑貧民，免富人雜徭以為息，約年豐還之，民不病饑。

宋元通鑑卷第一百四十七

宋元通鑑卷第一百四十七

宋元通鑑卷第一百四十八

明賜進士前中憲大夫浙江按察司提學副使兩京吏禮郎中武進薛應旂編集

長洲 陳仁錫評閱

元紀二十 起丁丑至庚辰凡四年

順帝二

至元三年春正月癸卯廣州增城縣民朱光卿反其黨石昆山鍾大明率眾從之偽稱大金國改元赤符命指揮狗札里及江西左丞沙的討之戊午帝獵于柳林凡三十五日御史丑的宋紹明進諫帝賜以金帛丑的等固辭帝曰昔魏徵進諫唐太宗未嘗不

丑的

宋紹明

許謙

賞汝其受之、婺州路總管府以金華儒士金履祥所著論語孟子考證來上、命刊行之、其門人東陽許謙序之曰、聖賢之心盡在四書、而四書之義備於朱子、顧其立言辭約意廣、讀者咸得其粗、而不能悉其其義、或以一偏之致自異、而初不知未離其範圍、世之詆訾貿亂、務爲新奇者、其弊正在此耳、此金先生考證之所由作也、始余三四讀、自以爲瞭然、已而不能無惑、久若有得、覺其意初不與已異、愈久而所得愈深、與已意合者亦大異於初矣、童而習之、白首不知其要領者何限、其可以異心求之哉、履祥字吉甫、

號仁山、謚文安、所著有考證及尚書表註通鑑前編行于世、二月壬申朔、日食、棒胡反于汝寧、信陽州、棒胡本陳州人、名閏兒、以燒香惑衆、妄造妖言、作亂、破歸德鹿邑、焚陳州、屯營于杏岡、命河南左丞慶童帥兵討之、甲申、定服色器皿輿馬之制、己丑、汝寧獻所獲棒胡彌勒佛小旗、僞宣敕并紫金印量天尺、辛卯、發鈔四十萬錠、賑江浙等處饑民四十萬戶、開所在山場河泊之禁、聽民樵采、庚子、中書叅政納麟等請立採珠提舉司、先是嘗立提舉司、泰定間以其煩擾罷去、至是納麟請復立之、且以採珠

戶四萬賜伯顏、三月戊午立弘吉刺氏爲皇后、后名伯顏忽都、武宗皇后之姪、孛羅帖木兒之女也、是月天雨線、夏四月壬申遣使降香于龍虎三茅閣、皂諸山、癸酉禁漢人南人不得執持軍器、凡有馬者拘入官、甲戌有星孛于王良、至七月壬寅沒于貫索、己卯帝如上都、辛卯合州大足縣民韓法師反、自稱南朝趙王、丁酉謚唐杜甫爲文貞、己亥惠州歸善縣民聶秀卿譚景山等造軍器、拜戴甲、爲定光佛、與朱光卿相結爲亂、是月詔省院臺部宜慰司廉訪司及郡府幕官之長、並用蒙古色目

人、禁漢人南人不得習學蒙古色目文字、五月辛丑、民間訛言、朝廷拘刷童男童女、一時嫁娶殆盡、戊申、詔汝寧、棒胡、廣東、朱光卿、聶秀卿等皆係漢人、漢人有官于省臺院及翰林集賢者、可講求誅捕之法以聞、甲寅、西番賊起、殺鎮西王党兀班、尋蔓延至二百餘處、詔立行宣政院、以也先帖木兒爲院使、督兵往討之、丁卯、彗星見於東北、大如天船星、色白、約長尺餘、彗指西南、至八月庚午始滅、六月戊子、加封尹子庚、桑子徐甲、列子莊子各爲真君、是月、太白屢經天、屢晝見、屢犯太微垣、秋七月庚戌、

張寬

河南武陟縣禾垂熟有蝗自東來縣尹張寬仰天祝曰寧殺縣尹毋傷百姓俄有黑鷹羣飛啄食之是月狗札里沙的擒朱光卿尋追擒石昆山鍾大明八月壬午京師地大震先是京師大霖雨凡十三日御河沁河渾河皆溢没人畜田廬不可勝計至是地大震太廟梁柱裂各室墻壁壞壓損儀物及文宗神主御狀凡六日方止所損人民甚衆九月己酉文宗新主玉冊及一切神御之物皆成詔依典禮祭告冬十月金華處士許謙卒謙字益之父觥登淳祐七年進士仕未顯而歿謙生數歲而孤甫能言母陶

氏口授孝經論語入耳輒不忘稍長肆力於學立程以自課雖疾恙不廢既乃受業金履祥之門履祥語之曰士之爲學若五味之在和醯醬既加則酸醎頓異子來見我三日矣而猶夫人也豈吾之學無以感發於子邪謙聞之惕然居數年盡得其所傳之奧履祥既沒謙益肆充闡多所自得自謂吾非有大過人者惟爲學之功無間斷爾平生制行甚嚴而所以應世者不膠於古不流於俗屏跡八華山四方之士不遠百舍而來受業其教人至誠諄悉內外殫盡獨不教人以科舉之文曰此義利之所由分也不出里閭

垂四十年中外名臣列其行義章凡數十上郡以遺
逸應詔有司請主文衡皆莫能致世稱為白雲先生
卒謚文懿先是何基王栢金履祥歿其學猶未大顯
至謙而其道益著十一月太白復經天十二月
以馬扎兒台為太保分樞密院鎮北邊馬扎兒台伯
顏弟也時議進爵為王辭曰兄封秦王弟不宜並受
王爵故有是命伯顏請殺張王劉李趙五姓漢人不
從
四年春正月丙申以地震赦天下詔內外廉能官父
母年七十無侍丁者附近銓注以便侍養詔修曲

修造可也
祭告封謚

亂

辱矣

阜孔子廟二月丁卯罷河南江西浙江湖廣四川
等處行樞密院庚午帝獵于柳林夏四月辛未
京師天雨紅沙晝晦以探馬赤只兒瓦反為中書
平章政事己卯帝如上都河南執棒胡京師誅
之癸巳帝次八里塘雨雹大如拳其狀有小兒環
玦獅象龜卵之形五月命佛家闔為考功郎中喬
林為員外郎魏宗道為主事考較天下郡縣官功過
六月漳州南勝縣民李志甫聚眾圍州城守將擗
思監與戰失利詔江浙平章別不花發閩浙江西廣
東四省兵討之不克既而州人陳君用者襲殺之龍

亂

黃佐才

巖尉黃佐才與賊戰，妻子四十餘口皆被害。事聞，授佐才龍巖縣尹。袁州人周子旺亦舉兵，稱周王。改年建號，尋敗死。秋七月己酉，奉聖州地大震。丙辰，鞏昌府山崩。八月癸亥朔，日食。丙子，京師地震。日二次，至乙酉方止。帝還大都。閏月，屢日赤如赭。冬十一月丁卯，立紹熙府軍民宣撫都總使司。本府元領六州二十縣一百五十二鎮，國初以其地荒而廢之。至是，居民二十餘萬，故立府治之。十二月戊戌，立邦牙等處都元帥府，并總管府。先是，世祖以其處雲南極邊，就立其酋長爲帥。至是，來貢，故立官

府。是歲，太白屢經天。

五年春正月癸亥，禁濫予僧人名爵。二月庚寅，信州雨土。夏四月乙未，加封孝女曹娥爲慧感靈孝昭順純懿夫人。帝如上都。六月，汀州大水平地，深三丈，沒民廬八百家，溺死者八千餘人。秋七月甲申，常州宜興山水出，勢高一丈，壞民廬舍。是月，太白屢經天。八月丁亥，帝還大都。九月，太白屢經天。冬十月壬辰，禁倡優盛服。男子裹青巾，婦女服紫衣，不許戴笠乘馬。甲午，詔命伯顏爲大丞相，加元德上輔功臣之號，賜七寶玉書、龍虎金符。十

亂

一月戊辰杞縣人范孟謀不軌詐爲詔使至河南行省殺平章政事月魯帖木兒廉訪使完者不花等召官屬及去位者署而用之執大都路儒學提舉歸暘俾北守黃河口暘力拒不從賊怒繫之獄旣而官軍捕孟誅之凡污賊者皆得罪暘得免暘同里有吳炳者嘗以翰林待制徵不起賊召司卯酉曆炳懼不敢辭時人爲之語曰歸暘出角吳炳無光暘之名用是大著尋由國子博士拜監察御史入謝臺臣奏曰此河南抗賊不屈者帝曰好事卿宜數爲之賜以上尊癸酉瑞州路新昌州雨水冰至明年二月始解

亂

字木魯狎卒狎字子暈家于鄧州之順陽狀貌魁梧不妄言笑其爲學一本於性命道德而記問宏博異言僻語無不淹貫文章簡奧典雅深合古法用是天

下學者仰爲表儀居國學久論者謂自許衡之後能以師道自任者唯耶律有尚及狎而已伯顏構陷

鄒王奏賜歿帝未允輒傳旨殺之又奏貶宣讓王帖木兒不花威順王寬徹普化不俟命即遣之帝爲之不平

六年春正月甲戌奉太祖太宗睿宗三朝御容於石佛寺二月己亥黜中書大丞相伯顏爲河南行省

左丞相伯顏既誅唐其勢獨秉國鈞遂專權自恣變亂成憲虛害天下漸有異謀帝患之伯顏欲以所養弟之子脫脫宿衛偵帝起居懼涉物議乃以知樞密院汪家奴翰林學士承旨沙剌班同侍禁近實屬意脫脫故脫脫政令日修衛士拱聽約束伯顏自領諸衛精兵以燕者不花為屏蔽導從之盛填溢街衢而帝儀衛反落落如晨星勢焰熏灼天下之人知有伯顏而已脫脫深憂之私請於父馬扎兒台曰伯父驕縱已甚萬一天子震怒則吾族赤矣曷若於未敗圖之其父亦以為然脫脫復質於師吳直方直方曰傳

脫脫
馬扎兒台
吳直方

世傑班阿魯

有之大義滅親大夫但知忠於國爾餘復何顧焉一日見帝乘間自陳忘家徇國之意帝猶未之信時帝前後左右皆伯顏之黨獨世傑班阿魯為帝腹心乃遣二人與脫脫遊日以忠義之言相與往復論辨益悉其心靡他遂聞于帝帝始信之無疑及伯顏擅貶宣讓威順二王帝不勝其忿決意逐之一日泣語脫脫脫脫亦泣下歸復與直方謀直方曰此大事議論之際左右為誰曰阿魯及脫脫木兒直方曰子之伯父挾震主之威此輩苟利富貴其語一泄則主危身戮矣脫脫乃延二人于家置酒張樂晝夜不令出遂

與世傑班等謀欲候伯顏入朝擒之戒衛士嚴宮門出入螭坳皆為置兵伯顏見之大驚召脫脫責之對曰天子所居防禦不得不爾然遂疑脫脫亦增兵自衛至是伯顏以所領兵衛請帝出田脫脫勸帝稱疾不往伯顏固請乃命太子燕帖古思出次柳林脫脫遂與阿魯等合謀悉拘京城門鑰命所親信列布城門下是夜奉帝居玉德殿召省院大臣先後入見出五門聽命夜二鼓遣怯薛月可察兒率三十騎抵營中取太子入城又召楊瑀范匯入草詔數伯顏罪狀出為河南行省左丞相命平章政事只兒瓦歹賫赴

法詳月可察兒楊瑀范匯

柳林黎明遣騎士至城下問故脫脫倨城上宣言有旨黜丞相一人諸從官皆無罪可各還本衛伯顏奏乞陛辭不許道出真定父老奉觴酒以進伯顏曰爾曹見子殺父事乎對曰不曾見子殺父惟聞有臣弑君伯顏俛首有慚色以馬扎兒台為太師右丞相塔失海牙為太傅知樞密院事塔馬赤為太保御史大夫汪家奴為中書平章政事脫脫知樞密院壬寅詔脫脫之外諸王侯不得懸帶弓箭及環刀輒入內府己酉彗星見凡三十二日是月京畿大水三月丁丑以治書侍御史帖睦爾為奎章閣大學

通鑑卷一百一十一 宋紀
士翰林直學士揭傒斯爲奎章閣供奉學士。四月丙午，詔封馬扎兒台爲忠王，賜號答刺罕，固辭不受。御史請示天下以勸廉讓，從之。五月丙子，帝如上都。六月丙申，詔廢文宗廟主，遷太皇太后弘吉刺氏于東安州安置，放燕帖古思于高麗。詔曰：昔武宗升遐，太后惑於憊慝，俾皇考出封雲南，英宗遇害，我皇考以武宗之嫡，逃居沙漠。宗王大臣同心翊戴，于時以地近，先迎文宗，暫總機務，繼知天理人倫所在，假讓位之名，以寶璽來上。皇考推誠不疑，即立爲皇太子。文宗當躬迓之際，乃與其臣月魯不花也里牙

明里董阿等謀爲不軌，使我皇考飲恨上賓。歸而再御宸極，又私圖傳子，乃構邪言，嫁禍于八不沙皇后。謂朕非明宗之子，遂俾出居遐陬，內懷愧慊，則殺也里牙以杜口。上天不佑，隨降殞罰。叔嬪不答失里，怙其勢焰，不立明考之冢嗣，而立孺稚之弟懿璘質班。奄復不年，諸王大臣以賢以長，扶朕踐祚，賴天之靈，權奸屏黜，永惟鞠育罔極之恩，忍忘不共戴天之義。其命太常徹去圖帖睦爾在廟之主，不答失里削太皇太后之號，徙東安州安置，燕帖古思放諸高麗。當時賊臣月魯不花也里牙已死，其以明里董阿等明

通鑑卷二百四十一
正典刑。時監察御史崔敬言。文皇獲不軌之愆。已徹廟祀。叔母有階禍之罪。亦削鴻名。盡孝正名。斯亦足矣。惟念皇弟燕帖古思年方在幼。罹此播遷。天理人情有所不忍。方明皇上賓。皇弟尚在襁褓。未有知識。義當矜憫。蓋武宗視明文二帝。皆親子也。陛下與皇弟燕帖古思。皆嫡孫也。以武皇之心爲心。則皆子孫。固無親疎。以陛下之心爲心。未免有彼此之論。臣請以世俗喻之。常人有百金之產。尚置義田以收養宗族。陛下富有四海。子育黎元。當使匹夫匹婦無不得所。今乃以同氣之人。置之度外。貽笑他邦。取辱中國。

儻生他變。關係非輕。臣願殺身以贖皇弟之罪。伏望陛下迎歸太后母子。以盡骨肉之義。書奏不報。未幾太后崩于東安州。燕帖古思遇害于中道。秋七月甲寅。詔封^厚微子爲仁靖公。箕子爲仁獻公。比干加封爲仁顯忠烈公。戊午。以星文不異。地道失寧。蝗旱相仍。頒罪已詔于天下。戊寅。命翰林奎章閣刪修大元通制。八月。帝還大都。九月癸丑。加封漢張飛武義忠顯英烈靈惠助順王。丙寅。詔今後有罪者。母籍其妻女以配人。冬十月壬寅。馬扎兒台辭右丞相。仍爲太師。以脫脫爲中書右丞相。鐵木兒不

夔夔

花爲中書左丞相。十一月辛未，以孔克堅襲封衍聖公。十二月，詔復行科舉。時科舉旣輟，翰林學士承旨夔夔從容言曰：古昔取人材以濟世用，必由科舉。何可廢也。帝采其論，復詔行之。國子監積分生員三年一次，依科舉例入會試，中者取一十八名。罷文宗增置官屬。初，文宗設太禧宗禋等院及奎章閣、藝文監，增置官屬有差。至是大臣議悉革罷。夔夔曰：民有千金之產，尚設家塾以延館客。堂堂天朝，一學房乃不能容邪。帝然之，改奎章閣爲宣文閣，藝文監爲崇文監，餘悉罷之。

宋元通鑑卷第一百四十八

--	--	--	--	--	--	--	--	--	--

宋史徽宗卷第一百四十八

終